

Fasnacht 2022

D'Schnaps bagge

E Basler Baizer hett e Idee gha, wie me e Virus ka vernichte, ganz bequem
E versüchte Geegestand in Baggoofe bi 100 Grad, das leest s'Problem.
Ha's probiert mit dr Schwiegeramsle, s'hett nit funggzioniert, y ka's nit verstoh,
die isch mit em genau glyych hässige Stai wieder zem Oofe usekoo.

Ych ha e alte Frind droffe; ouuuhh, hän mir uns lang nimmi gseh!
Mir hän is prächtig unterhalte Bimene Tässli Tee.
Und will me sich nit derf umarme, hämmer is nur berieht mit dr Fuscht
Aber als Zaiche vo dr Verbundehait hämmer denn d'Gsichtsmasgge tuscht.

Liebed ihr au Graubünde? D'Lyt sin sympathisch und au gueti Chrischte
Es hett sich jetzt aber usegestellt, deert oobe lääbe schlimmi Rassische.
Wenn ich deert Ferie mach, teent's amme ganz unagnähm in de Ohre,
wenn e Bündner zue mir sait: «Ey, tschau, bis Moore»!

Ych bi jetzt neu kantonale Primate-Beuffdraite – ouh, hän die Freud im Zolli,
ych tritt fir d'Rächt vo däne Tierli yy und ha d'Verantwortig – die voll!
Jetzt hett dr Grossi Root zuesätzlich – ych ha's geschter de Affe verzellt,
mir au no grad d'BVB-Verwaltig unterstellt.

Wissed ihr, wär d'Sächs in isch? Wenn uff Allschwil kunsch, kennsch se grad,
oder d'Zähnin uss em Laimedaal, oder d'Achtin us em Neubad?
D'Zwein us em Eglisee, vo däre muesch nyt welle,
ych ha au numme dschendergerächt welle e baar Tramlinie uffzelle.

Ych bi jetschthi dur d'Stadt flaniert, die Freyi Stross durab, elai, ohni Kollege,
do kunnt mir doch uff halber Höchi soone Bättler entgege.
«Du mir geben Geld, ich arm, keine Frau», so hett är s'Gspröoch yyglyttet.
Do sag y: «Kasch e Wuche **mi Frau** ha, denn waisch, was arm syy bedyttet.»

Dr vo Wattewyl hett zum Häbse gsait: «Los Alte, ych mach's do nimm lang,
Basilisk, TeleBasel, aber bi dir isch jetzt Schluss, das stresst mi efang.»
Wo das bekannt worde isch – hey, es isch woor und schriftlich begründet –
hän eppe 2000 Fraue bim Häbse-Theater s'Abo kündet.

Noch em Lockdown hett unsere Opinion Leader e Speech duuregfiehr
Är hett an Commitment und an Business Interest appelliert:
«D'Roadmap fir Approach und Apertizing stoht, mir geehn All in One,
s'Fact-Sheet fir d'Customer Retention au, hey Guys, have Fun!
Fir Distribution Inhouse gänd em Guschti e Message dä kennt s'Handling genau,
fir Screening brucht's Brand-Experience und Life Balance, das macht e Frau.
Wenn ihr s'Process Recap in Exit-Mode yybindet, ka sich niemer beklage,
Zaiget Hard Skills, sind Game Changer, ihr mergged, was ych will sage»!!

Ych dringg zem Zmorge e gaaanz glaine Kaffi und iss e gaaanz glaini Schnitte
Zem Znacht e Müesli und e Glas Wasser, do muesch ych aber scho drum bitte.
Und sunscht im Lääbe unuffällig und demüetig blyybe, das isch mini These,
Ych schaff halt nit bi dr Raiffyise und ha kaini Spese.

Wottsch au by uns bänggle?
Uff www.vsg-basel.ch erfahrsch meh!



Drugg: Amerbach'sche Druckerei, Muttenz